



UPA 2017/184

18.05.2017

Peter Olsen

Ilangussaq A-mi saqqummiunneqartut aallaavigalugit Sanaartornermi ilinniartoqarneq pillugu Namminersorlutik Oqartussat Nalunaarutaat nr. 10, 12. juli 2010-meersup nalimmassarneqarnissaanik Naalakkersuisut peqquneqarnissaat pillugu Inatsisartuni aalajangiiffigisassatut siunnersuut.

(Inatsisartunut ilaasortaq Bendt B. Kristiansen, Inuit Ataqatigiit)

Inatsisartunut ilaasortap Bendt B. Kristiansenip Inuit Ataqatigiinneersup aaliangiiffigisassatut siunnersuutaanut qulaani pineqartumut qujalluta, matumuuna Inuit Ataqatigiinniit imatut oqaaseqassaagut.

Inatsisartunut Ilaasortap Bendt B. Kristiansenip siunnersuuteqarnermini tunngavilersuutai ilisarisarinnaaullarlutigit Inuit Ataqatigiinniit oqarsinnaavugut.

Bendt B. Kristiansen ilumoorpoq, oqarami ukiuni kingullerni sanaartornerup iluani, ilinniartunngorusulluni suliffeqarfinni sungiusarfissaaleqinerujussuup iliuuseqarfigineqarnissaa pillugu oqallinneq annertungaatsiarsimasoq, taamaattorli aamma iliuuseqarfigineqarpiarsimangitsoq.

Naatsumik oqaatigalugu Bendt B. Kristiansen ilumoorpoq oqarami suliffeqarfinni sungiusarfissaaleqinerujussuaq annertuallarujujussuartoq piffissanngortorlu tamatuma iliuuseqarfigineqarnissaa.

Sanaartornermi ilinniarfiup Sisimiuniittup aamma tamanna uppernarsisinnaavaa. Sanaartornermut ilinniarfiup takusassiatut saqqummiussimasaani takuneqarsinnaavoq ukiuni kingullerni sungiusar-fissaaleqinerup qanoq ineriartorsimanera. Takussutissiami takuneqarsinnaavoq suliffeqarfiit sungiusartussanik tiguisarnerat ukiuni kingullerni annikilligaluttuinnarsisoq.

Assersuutigalugu takussutissiami takuneqarsinnaavoq 2008-miit 2012-mut ilinniartut 80-it sungiusartussatut tiguneqarsimapput, ukiunili kingullerni kisitsit apparaluttuinnarsimapput, allaat 2017-mi ilinniartut sungiusartussatut tiguneqarsimasut taamaallaat 32-innaasut.

Aali sungiusarfissaaleqineq pillugu akiuuniarsarisugut, killormorluinnarli ingerlasoqarpoq. Tamanna ajorpoq uggornarpoq akuerineqarsinnaanngilarlu.

Tamannarpiaarvorlu Bendt B. Kristiansenip Inatsisartut inatsisaanni nr. 11-mi 2. dec. 2009-meersup nalilersuiffigeqqinneratigit iliuuseqarfigequssaa; taassumalu saniatigit Sanaartornermi ilinniartoqartarneq pillugu Namminersorlutik Oqartussat nalunaarutaat nr. 10, 12. juli. 2010-meersumi §1-mi imm.2-mi allassimasut peerneqarnissaat aamma siunnersuutigalugu.

Imm.2-mi ilaatigit ima allassimasoqarpoq:

Imm.2. Nalunaarutip atuuffigisassarinnngisai tassaapput: Tassa imaappoq sanaartorfiusuni ataani pineqartuni suliffeqarfiit praktikkertussanik tigusinissamat pinngitsaalineqarsinnaanngillat:

1. Piginneqatigiilluni inissiat, sanatitsisunit namminersortunit sananeqartut aningaasalersorne-qartullu, tamatumalu kingorna piginneqatigiilluni inissiatillit peqatigiiffiannut tunniunneqartut.
2. Namminersortut inissialiortiternerat, Inatsisartut aningaasanut inatsisaanni oqaasertaliussat naapertorlugit taarsigassarsititsinissamik neriorsuuteqarfiusut.

Naatsumik oqaatigalugu; sanaartorfiusussat suulluunniit tamarmik pisortat aningaasaleeqataaffigisimasaat pinngitsooratik praktikkertussanik tiguisinnaalernissaannik piumasqaateqartalernissatsinnik siunnersuuteqartup oqariartuutaa isumaqatigaarput.

Sapinngisarput tamaat atorlugu praktikkerfissaaleqinerup akiorneqarnissaa Inuit Ataqatigiinniit peqataaffigerusupparput iliuuseqaqataaffigerusupparpullu.

Taamaattumik taamatut oqaaseqarluta Bendt B. Kristiansenip siunnersuutaa Inuit Ataqatigiinniit taperserlugu ataatsimiisitaliamut susassaqartumut suliareqqitassanngorlugu ingerlateqqipparput.

Qujanaq